

DESCRIPTION DE IUTTIE, OV TERRE DES CIMBRES.

Iuttie contient en longueur, octante lieues d'Allemaigne, selon que ie puis tirer de la description de Dannemarche, de noble, & docte homme, & es arts liberaux bien instruit, le Seigneur, Henry Rantzou, Conseillier du Roy de Dannemarche en son Conseil priué, & Lieutenant pour le Roy en ses Duchez de Slesuyé, Holsate & Dithmarche. Ce pays s'estend vers le Nord, du fleuve l'Albe, iusques ou Cap des Cimbres, vulgairement dict Schagen : & en la contrée d'Aelbourg, contient en largeur vingt lieues, Ceste Prouince contient des belles contrees, citez, villes, chasteaux, villages. L'extreme limite de ce pays vers Septentrion, est la terre de Wensussel, à laquelle se cõfine le Cab des Cimbres: lieu vrayemēt aux nauigans bien dangereux, à cause de la Languette sablonneuse, qui descend de la riue bien loing en Mer. Ce terroir est moins fertile, que les autres qui sont situez vers midy & l'Occident. Les habitans font mestier de paistre bestail, & de pescherie, ils n'ont nuls ports n'y bouches de Mer pour sauuer les barques: mais assemblent les voisins, & tirent les barques si haut sur la gerue, iusqu'à ce qu'elles sont hors de dangier de la tempeste de Mer. Ils demeurent es maisons faicts de bois & de planches ionctes ensemble: souuent aduient aussi, que le sablon pouffé par l'orage du vent, enuoloppe presq̃ue celdictes maisons, de sorte que les habitans le matin escueillez, sont cõtrinctz descendre par les toictz. Ces edifices sont si legeres, qu'on les peut transporter d'un lieu à l'autre Puis s'ensuit la partie principale de Iuttie Septentrionale, laquelle est tresfertile de Fourment, Seigle, Orge, & grains semblables, principalement vers l'Orient. Car la partie Occidentale, qui cõfine à la Septentrionale, n'aguerres de terre labourable, mis assez de pasturages & prairies delectables: laquelle enuoye es autres Prouinces grand nombre de cheuaut, & d'autres bestail. Le Pays de Iuttie contient 28. villes, quatre Eueschez à sçauoir Ripe, Arrhuse, Aelbourg sur Mer, & Wibourg ville mediterrannée: plus vingt chasteaux Royaux, quartorze monasteres, sans ceux qui sont es villes. De ceste & autres Prouinces de Dannemarche est enuoyé chascque année grand nombre de bœufs: car on trouue par le registre du Coutumier de Gotdorp, qu'en vne seule année en sont sortis cinquante mille bœufs. En la mesme Prouince, est le Duché de Slesuyé, laquelle fut iadis appellé Iuttie Orientale, & cõtient entre eider & Colding dixhuiet lieues. De ceste Prouince est Slesuyé ville capitale, qui fut iadis ville marchande bien renommée de laquelle ce pays à obtenu le nom. Cediect pays fut aussi appellé iadis, le Duché de Iuttie: duquel fut premier inuesti comme fief hereditaire par le Roy Eric, Waldemar ne pteu d'Abel Roy de Dannemarche, à sçauoir l'an de grace 1280. Or defaillante la lignée Royale & masculine, le Duché de Slesuyé est escheu à la couronne de Dannemarche. Parquoy Marguerite Royné de trois Royaumes, Dannemarche, Suede & Noruege, en à inuesty comme de fief hereditaire Girard Conte de Holsate, à condition, qu'il recognoistroit quand l'opportunité se presente, le benefice receu du Roy de Dannemarche. Pour le dernier, Holsate est situé aux limites de Saxe, es limites extremes de Iuttie vers midy, & fut iadis appellé Nordalbinge, & Iurisdiction derniere, vers Septentrion, de l'Empire Romain.

Plus est à considerer, que Iuttie est la mesme region, que Prolomee, Cornille Tacite, & autres auteurs, nomment Cimbrica Chersonesis: les habitans de laquelle, furent iadis gens couragieux, belliqueux, & vaillans, qui & deuant, & apres la natiuité de Iesu Christ, ont faicts des guerres alpres & cruelles contre les Allemans, principalement (comme dict Munstere) cinquante ans deuant la natiuité de Iesu Christ. Car alors sont ils sortis en tresgrand nōbre avec leurs familles, & venuz en Westfale: puis apres auoir passé le Rhy n, se sont ioinctes à iceux plusieurs autres nations, & finalement sont tous ensemble par les Alpes entrez en Italie, à fin de chercher habitatiōs nouvelles. Ce que voyans les Romains, ont assaillis avec grande armee ceste rapsode, & faict d'iceux vn horrible massacre, digne de memoire. Les Cimbres doneques ayans perdu Ottante mil hommes, eux seioignans des Allemans & Gaulois, qu'ils auoyent avec eux, sont esté presque tous occis des Romains, pres du fleuve Ades. En ceste centree ont autresfois demeurez les Saxons, qui donnerent secours aux Britannois, quand des Pictes & Escossois, venans d'Yrlande, ilz furent oppressez: à sçauoir entre Iuttie & Holsate (ainsi que ledict Seigneur Henry Rantzou diligemment escrit, en son liure du peroides des Empires) au lieu ou le fleuve le Slie, & Flenbourgeruyé font vn coing, ou angle. Parquoy aussi sont nommez Anglois. Ces Anglois appelez à secours des Britannois, sont avec leurs forces, & l'assistance des Cimbres & Saxons à eux ioinctes, partis de leurs ports bien commodes, situez sur la Mer Occidentale, & passez en Britannie: ou ils ont repoussez les Pictes & Escossois, mais point du tout chassés de l'Isle Car ils occuperent la partie Septentrionale de l'Isle, laquelle ils possèdent iusques au iourd'huy, & l'appellent Escosse. Or comme les Anglois eurent secourus les Britannois, sans en receuoir aucune recompence, ils ont choisy lieu de Perpetuelle habitation, & ont appellé la partie Meridionale de Britannie, Angleterre: comme encores pour le iourd'huy le langaige Anglois est bien peu different du Saxon & Danois Parquoy ce mot Angleterre, ne peut deriuier d'Anguris peuple de Westphale, ny aussi de Anclam, ville de Pomeranie, comme aucuns afferment.